

**A) Le o texto seguinte e contesta as cuestións:**

*« (...) Antes do dezasete, o sentimento de galeguidade ficaba cáseque totalmente esmorecido na nosa terra. A nosa lingua, a nosa lírica, as cousas da nosa Historia eran estudadas e tratadas por algúns, moi poucos, galegos, como feitos arqueolóxicos. Unha erudición fría falaba das características raciaes cun xeito ouxetivo; tal que si Galiza fose un planeta morto e lonxano. Facíanse inventarios do pretérito sin emoción algunha, agás en contadósimos conterráneos. As caro provincias en que nos escindiu o centralismo vivían a vida administrativa hespañola, desvencelladas unhas das outras, sin sentiren xa a máis pequena saudade da vella unidá galega. E os poboadores das mesmas (...) trocados en sinxelos habitantes dun territorio que deixara de ser un país con alma, en loita suicida co seu propio ser, tiñan a Madri (sic) polo seu único meridiano inteleitual, «moral» e artístico (...)*

*Pois ben, entón a penas ningún home culto da nosa terra emocionábase miga coas cousas enxebres. Polo contrario: adoitaban ollarse con indiferencia cando non con desprecio, coidándoas inferiores ás do resto da Hespaña. A rexa colonización castelá chegara a infundir na maioría dos nosos paisanos o presentimento vergoñoso da propia autoinferioridade, que inda hoxe custa caro desbotar de algúns.*

*Meu irmán Ramón e máis eu, os primeiros que concibimos o arredismo en Galicia, en parolas íntimas, decatados de tan triste fenómeno, falábamos da necesidade de facer o intento dunha forte e fera sementeira nacionalista. Era cando os aliados da gran guerra procraban o dereito á liberación das pequenas terras asoballadas. En artigos que publiquei en La Voz de Galicia, que mereceron os honores da polémica, comezou todo o apostolado. Seguidamente din a lus o folleto aceso de amor á patria, co rubro de Nacionalismo galego – nunca aquí se falara de nacionalismo- que esgotouse decontado, merecendo louvanzas serias dos xornaes de tódolos matices...».*

**Antón Villar Ponte, O loitador inesquecente**

**CUESTIÓN**

- 1. Resume os trazos que, segundo opina Villar Ponte, caracterizaban o panorama cultural galego antes da creación das Irmandades.**
- 2. Que circunstancias histórico-políticas rodearon a fundación das Irmandades, segundo o seu máximo promotor?**
- 3. A través de que medios ou canles se espallou a nova ideoloxía?**



## SOLUCION

**1. Resume os trazos que, segundo opina Villar Ponte, caracterizaban o panorama cultural galego antes da creación das Irmandades.**

- A inexistencia dun sentimento de galeguidade no pobo galego, que levaba consigo unha desvalorización da lingua, da lírica e da historia.
- Un excesivo centralismo, con Madrid como núcleo básico, cidade a onde se dirixían todas as miradas considerándoo un modelo a seguir e imitar.
- Un sentimento xeneralizado de inferioridade con respecto ao resto de España.

**2. Que circunstancias histórico-políticas rodearon a fundación das Irmandades, segundo o seu máximo promotor?**

A primeira guerra mundial, 1914, na cal os aliados proclamaban o dereito dos pobos con identidade propia, e que foran colonizados ou asoballados por outros, a defender o seu e liberarse.

**3. A través de que medios ou canles se espallou a nova ideoloxía?**

Por medio da prensa, dos diversos xornais, e folletos propagandísticos.

**B) Le o seguinte texto e contesta as seguintes cuestións:**

*O esforzo das derradeiras xeracións galegas tiña un obxectivo fundamental: recoller a nosa espíritoalidade, esmigallada durante varios séculos de inercia cultural, e darlle cohesión interna, conciencia de si e pulo creador. Só así se podía reconstruír a persoalidade de Galicia como pobo. Era unha empresa esforzada e urxente, porque a nosa conciencia colectiva tiña chegado aos lindeiros da atonía letal, estaba a piques de se deixar caer na escura sima da vida intrahistórica.*

*Temos que reconocer que, no seu núcleo esencial, este obxectivo ideal foi cobrando realidade crecente. Galicia ten hoxe conciencia do seu propio ser e dos dereitos que lle son naturalmente inherentes. A fe das abnegadas minorías que souperon emprender o camiño do rexurdimento chegou a quebrar a códea da inmovilidade, da resignación, da pasividade fatalista e, sobre o corpo esmacelado da vella Galicia, foise configurando pouco a pouco a imaxe dunha Galicia nova. Hoxe sabemos cales foron os males que lle esmigallaron o espírito e cales son os remedios para lle desentangarañar o corpo.*

*Este primeiro paso cara a autoconciencia, cara o autoconocemento, era fundamental e decisivo. Sin esa conciencia, do propio ser, sin ese sentimento colectivo da propia persoalidade e dos seus dereitos naturais, Galicia subsistiría como país mais deixaría de existir como pobo. Comezouse, é certo, por percurar esa persoalidade no pasado histórico. Era o tributo obrigado ao ambiente romántico inicial. Desde entón andivemos moito camiño. Hoxe non percuramos no pasado histórico a fisonomía da nosa persoalidade colectiva. Percurámola directamente nas súas manifestacións vivas e actuais. De aquel ollecer alimentado nos lagos encantados da evocación histórica pasamos a desenvolver unha creación cultural autóctona afincada nas grandes inxedanzas e nos horizontes do noso tempo.*

*Nese plano de creación cultural, a presenza de Galicia vaise afirmando de maneira cada vez máis decidida. Galicia manifesta así a realidade orixinal do seu ser xenuino e a vontade de o desenvolver plenamente. Todo pobo leva en si unha orixinal posibilidade cultural. E todo pobo que desenvolve esa posibilidade ten, mesmo por eso, un posto activo na historia. Está xa camiñando na dirección renovadora.*

*Ben sabemos que non abonda con eso para desentangarañar o noso corpo social, que é, naturalmente, a máis punxente das nosas arelas. Para acadarémolo será precisa unha teimosa e intensa acción reformadora e anovadora que modifique a estruturación administrativa, económica e cultural do noso país. Pro non se chegará de veras a esta etapa sin antes desenvolver plenamente a anterior. Na mesma medida en que arraíce e se estenda a nosa vida cultural, estenderase e arraizará a nosa conciencia colectiva de pobo con persoalidade de seu e con vontade de a desenvolver.*

*Nesta conciencia fonda e rexa do propio ser é onde radica verdadeiramente o destino histórico do pobo galego. Sin eso valerían de ben pouco tódalas estruturas institucionais que se lle poidesen ofrecer como solución aos seus problemas.*

**Ramón Piñeiro «Autoconciencia» (1962) en *Olladas no futuro* (1974)**

**CUESTIÓNS**

1. Explica a evolución na toma de conciencia da identidade de Galicia, segundo Ramón Piñeiro.
2. Cal é a importancia das minorías nese proceso?

## SOLUCIÓN

1. **Explica a evolución na toma de conciencia da identidade de Galicia, segundo Ramón Piñeiro.**

Nun primeiro momento, comezouse a percurar a personalidade histórica de Galicia no pasado histórico compartido.

Na actualidade, son as accións culturais actuais autóctonas as que conforman a identidade como pobo e poñen en valor a personalidade do noso pobo. Esta toma de conciencia conlevará un cambio na estruturación administrativa, económica e cultural do noso país.

2. **Cal é a importancia das minorías nese proceso?**

A loita incansable das minorías posibilitou nun primeiro momento a creación da imaxe dunha Galicia nova, rompendo vellos estereotipos negativos e impoñéndose á inmovilidade e a resignación